

GAZA HUMANITARIAN FOUNDATION: PALESTINARRAK DESPLAZATZEKO ENEGARREN BIDEA

Lau astetan 550 hildako eta 4.000 kolpatu egon dira GHF fundazioaren banaketetan. Jakiaz gain, tiroak ere banatzen dabiltzalako sionistak. 170 GKEk dute egitura horren desagerepena galdatzen. Baina Israelek beregain nahi du laguntzaren saila ere –finean, gosetearena badelako gerrako arma hilkorra–. Maiatzaren

16an Israelek abiatutako *Gedeoneko orga* operazioaren baitan kokatu behar da GHF. Azken horrekin "Gazaren konkista" eta gazatarren "hautuzko abiatzea" du Netanyahu helburu. Nola? Jaki gune bakanetara jendea desplazatuta eta bizilekuak beti eta beti bonbardatuta, behingoan itzuli ez daitezen.

 JENOFA BERHOKOIRIGOIN

Ez dago egutegi argirik. Batzuetan, goizeko lauetan irekitzen dituzte ateak, beste batzuetan geroago. Bezeratik daude esperoan palestinarak. Azkenean, ateak irekitzen direnean, kolapsoa da. Ez dago jende-lerrorik, ez langilerik, ez seinalerik. Zarata, errautsa eta beldurra, besterik ez. Putreen gisara inguratzen dituzte droneek. Bozgorailutik ahots bat, oihuka: 'Lau minutu. Hartu ahal duzuna'. Hondarraren erdian uzten dituzte janari kutxak, baina ez dago nahikorik. Inoiz ez dira nahikoak. Jendea presaka doa metarantz, elkarri bultzaka, elkarren gainean igota. Labanak ateratzen dira. Borroka sortzen dira. Umek oihu egiten dute. Gizonak erortzen dira. Emakumeak arrastaka dabilta. Gutxi dira kutxa bat hartu eta hari eusteko gai diren zortedunak. Orduan tiroketa hasten da. Masakre-eremu bihurtzen da hareazko plaza. Bizirik ateratzen nahian korrika dabilta. Anitz tirokatuak daude. Batzuek zauriturik arrastaka ibiltzea lortzen dute. Lagunek, senideek edota ezezagunek eramanik dira beste batzuk. Besteak bakarrik odolusten dira hondarretan". Gazan biziraute dabilen Taqwa Ahmed Al-Wawi idazlearen kontakizuna da, ekainaren 29koa, Al-Jazeera komunikabidean irakurri dezakeguna.

Amerikarrek eta israelarrek bideraturiko GHF Gaza Humanitarian Foundation-en janari banaketaz ari da; hesiz inguraturiko lau gunetan bideraturikoa, maiatzaren

26az geroztik. Lau gune bi milioi herritarrentzat –GHF aitzin, 400 banaketa gune ziren Gazan baina–. "Heriotzaren korridoreak" deitzen dituzte, badakitelako israelarren tiroen artetik eta jende-metatze arriskutsuetatik bizirik ateratzea erronka zaila izanen zaiela. Baina, goseteak eta jaki falta orokortuak horretara bultzaturik, badaoz. Israeldar soldadu batzuen lekukotasunetan oinarriturik, *Haaretz* egunkariak argira ekarri du janari bila hurbildutakoak tirokatzeko manua dutela, eta hori "mehatxu ez badira ere".

Martxoaren 2az geroztik ez zen kamioi bakar bat sartu, erabateko blokeoa erabakia zutelako sionistek –aitzin, oztopoz oztopo, dozenaka pasatzen ziren, baina NBERen arabera, beharrezkoak zituzten 500 kamioiak baino anitzez gutiago–. Elikadura segurtasuna neurtzen duen IPC sailkapenaren arabera, "Gazako biztanleria osoa da elikadura-segurtasunik eza handian eta milioi erdi pertsona –bost pertsonatik bat– gosetean daude". Gose-tea arma gisa erabiltzeko gerra-estrategia geroz eta begi-bistakoa zela, kamioi bakar batzueri utzi zieten pasatzen, baina laguntza humanitarioa beraiek kontrolatzeko baldintzapean. Edo hobeto erranda, nazioartearen eta NBERen kontrolaz kanpo izateko baldintzapean. Orduz geroztik, horretan dira. Baina, kasu: palestinarrentzako laguntza humanitarioa ez da Israelen gogoan. Bestela, zergatik debekatu

nazioarteko laguntza oro? Zergatik nahasi oxikodona droga gogorra irin zakuei? Finean, palestinarren garbiketa etnikorako urrats berria dute laguntza humanitarioz moztortuta. Lau astez, laguntzaren bila zihoazen 550 palestinar hil eta beste 4.000 kolpatu dituzte Tsahalek edota sionistek sustengaturiko pertsona armatuak. "GHFren neurriak etsipen-, arrisku- eta heriotza-ziklo bati eusteko diseinatuta daude", irakurri daiteke uztailaren 1ean 170 bat Gobernu Kanpoko Erakundek zabalduko agirian. Egitura hori hestea galdatzen dute eta UNRWA Palestinar Iheslarietako Laguntza eta Lan Bulegoak, Palestinako gizarte zibilarekin eta eragile humanitarioekin elkarlanean bideraturiko laguntzaren berrezartzera deituta.

OINARRIA ETA ZERUMUGA: DESPLAZAMENDUA

Israelarrek bideratu nahi dieten patua desagerepenarena dela badakite palestinarrek. Horren barne ikusten dute GHF egituraren funtzioa ere. Gadi Algazi israeldar historialariak ere gauza bera dio, Orient XXI-n plazaratu berri duen *Gaza. Affamer-expulser, expulsar-affamer* (Gaza. Gosean atxiki-kanporatu, kanporatu-gosean atxiki) analisisan. Netanyahuaren gobernuak adostutako lau banaketa guneetan jartzen du begirada: bata da Gazako zerrendaren zentroan eta beste hiruak hego-hegoan, Rafahren mendebaldean –hots, ez dago



Argazkian, uztaila hasiera honetan gosez hildako Ayyub Sabir Abu al-Hasin. 29 urte zituen. Palestinarren kontrako gerra-arma gisa erabiltzen du gosea Israelek. (Argazkilaria: Anadolu/Getty Images)

loturik biztanleriaren kokapenaren eta gune horien artean-. Algazik argi du: "Helburua baitute 'populazioaren desplazamendua' hegoalderantz bultzatzea, ahal dela, 'kontzentrazio eremu'etara'. Baina neurriak hartu behar dira gizateriaren aurkako krimen bati dagokiona ezkutatzeke. Horretarako, lehenik eta behin, biztanleei janaria eman ziezaieketen erakunde humanitarioak ezabatu behar ziren, eta banaketa esperientziarik gabeko eta armadaren esku dauden erakundeen esku utzi behar zen". Netanyahouk berak errandakoa da, "jatorrizko lekuetara ez itzultzearen baldintzapean" bideratuko litzatekeela laguntza.

Aspaldikoa da palestinarrak Gaza uztearen amets sionista. Israelen sorreraz geroztik ari dira lekukoak behar minimoak oztopatzen, desesperazioaz beraien lurra utziko dutelakoan. Baina ez dute lortu, eta oraingoan ere ez: taldeko indartsuenak eta osasuntsuenak doaz jaki bila, itzulerako bidea egiteko aski indar dutenak eta gainera, Gaza iparral-

deko jendea ez dute konbentzitu –"Nor abiatuko litzateke bero sargorian bidaia luze bat egitera, dauden lekuko senideei ezin badiete janaria ekarri?"-. Beraien etxea ez abandonatzeko palestinarren determinazio sendoa nabarmentzen du historialariak.

Behin betiko deportazioa lortzeko ez da nahikoa jendea kanporatzea. Deserrotu egin behar dira, eta itzultzeko edozein aukera kendu. Hori horrela, paraleloki, suntsiketak areagotu ditu Tsahalek, gosearen bidez berehalakoan lortzen ez dutena eraispennen bidez eskuratzeko. Netanyahouk berak dio: "Gero eta etxe gehiago suntsitzen ari gara, ez dute nora itzuli. Ondorio logiko bakarra gazatarrek Gazako zerrendatik kanpo emigratu nahi izatea izango da. Gure arazo nagusia harrrera herrialdeetan dago".

Denbora aitzina doala, hiru "gune humanitario" ditu Israelek aurreikusten: Gaza hiriaren ingurukoa –50 km² inguru–; erdialdeko kanpalekuetakoak –85 km² inguru–; eta Mawasirenak, hegoal-

deko hondartzan zehar –8 km² inguru–. Hots, orain arteko lurraldearen %40an metatuko lirateke bi milioi jende. "Kontzentrazio-eremu" horien tamaina txikiak, handik ateratzeko debekuak zein bizibiderik eta azpiegiturarik ezak 'kontzentrazio-esparruez' hitz egitera daramate", Algaziren arabera. Rawhi Fattouh Palestinako Kontseilu Nazionalako presidenteak ere "deportazio orokortu bor txatua" salatu du.

Finenak, jakiak ala bonbak, esku berek banaturikoak dira, eta maiatzaren 16an abiatutako *Gedeoneko orga* operazio militar sionistaren baitan kokatu behar dira: "Gazaren konkista" eta palestinarren "hautuzko abiatzea" dituzte helburuen artean. Abisua emana du Tsahalek: etenik gabeko "tiroketa intentsoak" bideratuko dituzte, hiru gune horietara sartzea behartzeko. "Garbiketa etnikoaren" zantzu handiak daudela dio NBeko Giza Eskubideen goi komisarioak, eta halarik ere berdin segitzen dute nazioarteko estatuburuek: begiak estalita, konplize. ●



ZINKUNEGI
OPTIKA

Hernani 23 · 20004 Donostia

T. 943 420 624

zinkunegioptika.com

